

Di dos biahe di trabou di Fondo BJP den Caribe

Ronda di subsidio ta produci publicacion cu impactu real

E di dos biahe di trabou di Fondo BJP pa e seis islanan Caribense den Reino a muestra ki impactu un sosten dirigi na periodismo local por tin. Riba cada isla, periodistanan a conta con nan a uza e subsidio otorga den e prome ronda pa crea periodismo Caribense cu no solamente a stimula discusion social, sino cu ademas a conta cu resultado concreto.

Na Boneiro, Nathaly Evertsz a papia di e prome parti di su documental tocante ‘cold cases’ ariba e isla, loke a duna un perspectiva nobo na e manera con ta atende caso policial cu no a keda resolve ainda. Na Corsou, Tittel Del Mar a conta di su longread tocante cultura di coredonan di motorcycle, loke a bira un fuente di informacion pa un discusion social mas extenso. Na Sint-Maarten, e investigacion di Rajesh Chintaman tocante maneho di capmento di palo a resulta den supervision mas stricto y un promesa di parti di e clubnan pa planta mas palo rond di nan terenonan deportivo. Y na Aruba, scolnan awor ta inicia un combersacion cu nan alumnonan, uzando e documental di Ephrayim Odor tocante hobennan cu ta bay Hulanda pa studia. [Aki](#) por mira tur publicacion cu a keda realiza cu subsidio di Fondo BJP pa proyectonan Caribense.

Necesidad pa periodismo independiente

Segun Fondo BJP, e ehempelnan aki ta confirma con grandi e necesidad ta pa un periodismo independiente basa riba e realidadnan local. Durante combersacion cu periodista, creado di noticia, redactor y doño di medianan di comunicacion ariba e islanan, e siguiente pregunta tabata central: con por fortalece y halsa periodismo Caribense di forma structural? Durante e biahe, a resulta cu e necesidad pa intercambio y sosten ta grandi, mientras cu e posibilidadnan pa cumpli cu nan ainda ta limita.

“Nos a constata cu e bos Caribense cu ta resona den periodismo hopi biaha ta pertenece na un periodista cu ta biaha bai e islanan, saliendo for di un oficina di redaccion, caminda e tin sosten di un redaccion, siguridad financiero y un ret di sosten na Hulanda. Pero e falta tambe un ret local, conocimiento relevante di e contexto Caribense y e ta carece dominio di e idiomaan papia,” asina Wensly Francisco, experto di Fondo BJP pa areglonan di subsidio Caribense, ta bisa. “Mientras cu e periodistanan di e islanan mes tin nan propio bos, topico, experticio, metodo- y rednan social. Loke nan tin mester ta recurso financiero, siguridad di trabou pa por traha cu confiansa y plataformanan independiente cu ta permiti nan bos resona.”

Joëlle Terburg, director gerente di Fondo BJP, tambe a papia hunto cu Francisco, cu representantenan di gobierno y otro dirigentenan di e islanan. Semper pa haya contesta di un solo pregunta: ki tipo di periodismo e isla tin mester? “Den nos trabou, refuerzo di e funcion di periodismo pa mantene democracia den henter Reino ta central. Un periodismo solido y independiente ta esencial pa controla poder, haci desaroyonan social visibel y informa ciudadano. Pa por cumpli cu esaki di forma adecua, periodistanan mester por traha di manera independiente, sinti nan safe y haya suficiente recurso pa por eherce nan trabou,” Terburg a declara.

Tambe a delibera ta kico mas por haci pa stimula formacion di rednan conhunto, desaroyo profesional y colaboracion mutuo. “Periodistanan tin hopi necesidad di esaki, pero oportunidadnan ainda ta

limita. Esakinan ta tambe algun punto cu Fondo BJP lo sigui traha riba dje den colaboracion cu e periodistanan local, creadonan di noticia y demas partidonan relevante, banda di e sosten actual y continuo pa proyecto- y publicacionnan. Nos ta enfoca riba consistencia y construccion di relacion y oportunidad di subsidio duradero.”

Pa cuminsa, Fondo BJP lo organisa un sesion pa e periodistanan profundisa nan mes con atende cu cambio di clima, saliendo for di un perspectiva Caribense — pasobra cambio climatico ya ta afectando e islanan di Caribe di forma real — como parti di e Festival di Periodismo Hulandes na Deventer na september 2027. Mas informacion di esaki lo sigui despues.

Ronda di subsidio ya a habri

For di 11 di mei te 15 di juni, periodista- y creadonan di noticia cu ta biba den e parti Caribense di Reino por entrega un peticion pa subsidio di un proyecto. Por haya mas informacion [aki](#).

Bo kier keda na haltura?

Bo kier keda al tanto di e actividadnan di Fondo BJP pa sostene periodismo Caribense? Sigui nos den e medionan social of suscribi pa ricibi nos boletin – tanto esun [general](#) como e boletin [specificamente dirigi riba periodismo Caribense](#).